

大荔縣舊志稿

王典章題

大荔縣新志存稿卷十一

列女傳

按節婦貞女現政府不予旌表然社會輿論對於節凜冰霜志堅金石確有事實可徵者僉欽敬而稱頌之弗少衰具見荔邑民風淳樸古道猶存良可嘉已茲續修縣志仍依舊例善善從長之意已旌未旌以及賢孝婦女悉記諸列女傳內庶於挽回世道人心或不無小補云爾

補編

節孝

韓氏花瑤頭雷振官妻年十九歲寡一子連方年四歲家極貧晝夜紡績藉十指度日備嘗辛苦撫子成立爲之授室迄孫大烈生氏心稍慰以爲漸臻蔗境詎至光緒庚子氏年已七十五連方竟先卒氏

憂慮成疾旋即逝世計守節五十七年光緒十二年學使林獎給節苦心貞四字

王氏陳村孫成元妻年二十九歲夫卒遺子士敏守貞撫孤鬻餅供子讀書後士敏入庠爲請旌林學使給苦節完貞四字卒年七十歲守節四十餘年

趙氏東蘇村劉金鎖妻年二十九歲寡遺子女各一矢志守貞撫孤成立卒年七十餘朱學政以勁節貞心四字旌之

張氏東長城村党鵬舉妻鵬舉同治元年死於回氏時年十九歲子二歲家赤貧矢志守節晝則耕耘夜則紡績無冬無夏備極辛苦撫孤成民國十六年卒享壽八十三歲

尙氏城內姚天恩妻天恩被回戕害氏時年十九歲子一方二歲痛夫死於非命矢志守節撫幼孤浣濯紡績晝夜弗懈嘗言人無眞志

氣何能承先啓後立志不隨流俗遊會觀劇而村鄰婚喪莫不勉力  
攸助茹苦含辛六十餘年享壽八十四歲今孫曾滿堂家道蒸蒸日上  
謂皆氏之賢德所致也

董氏高遷村楊金堂妻清副貢高陵縣教諭文煥之女孫也賦性貞  
靜夙嫻姆訓年十六于歸上事重慈孝敬無違鄉里稱賢婦焉越五  
年金堂卒氏年二十一歲有女僅三齡家貧饔飧不繼含辛茹苦矢  
志彌堅或有勸之再醮者氏忿然拒之目眦盡裂其堅貞出於至性  
概可見矣後撫姪爲嗣子教養兼施愛逾己出清沈學政旌以如竹  
有筠四字卒於民國二十二年壽八十有二苦節六十一年

劉風香東白村人羌白陶赦糧之未婚妻年十七歲赦糧病故氏欲  
往弔父母不許並欲另訂婚約氏矢志靡他遂自經死嘉慶十五年  
旌表建立牌坊

王氏羌白陳鳳元妻七歲卽字陳及長夫家極貧無力完娶意欲退約氏聞言不樂及媒來達語議事氏卽厲聲曰當初只知許我於陳姓不知其他若不歸陳有死而已媒恐激變遂寢其事越數年氏二十餘陳姓仍無力完娶氏父遂自備粧奩又與壻備衣服冠履親身送至壻家并代租廈房兩間行結婚禮氏果執婦道守分安命貧苦不怨針耕度日夫婦相敬如賓後生一子名喜娃年方四歲鳳元逝世氏年未滿三十又值回亂攜幼子逃至澄邵年餘全恃針黹保全幼孤撫育成人清光緒二年地方紳士稟呈吳學憲賜柏舟矢志四字以旌其門

李氏興平村拜秉仁妻年二十七歲寡茹苦含辛撫孤成立享壽七十歲卒樊學使給柏舟遺範四字旌之

王氏陽村朱俊泰妻年二十歲寡矢志守貞卒於清宣統二年壽八

十三歲計守節六十三年

田氏陳村李月魁妻月魁卒時氏年二十餘矢志柏舟之死靡他撫二子文奇文英成立艱苦備嘗守節逾三十年

李氏周家營張慶春妻年二十七歲寡柏舟矢志撫孤成立卒年八十七歲守節六十年經邑紳呈請學憲旌以節孝可風四字

姚氏馮村董帝眷妻年十九而寡矢志不嫁撫孤成立苦節四十五年學憲吳大澂旌以節堅金石同治庚午年卒

續編

節孝

吳氏雙白村清候選訓導李南亭繼妻南亭卒氏僅二十六歲生一子一女皆幼專志撫養勤儉治家井井有條民國十三年卒年八十三歲苦節五十七年

馬氏雙白村清中書科中書李靖甫繼妻無出前室遺一子一女氏撫如己出靖甫卒氏年二十五歲矢志守節時翁姑在堂子女繞膝氏上事下撫孝慈兼盡現年六十二歲苦節三十七年

張氏東官池村劉寬兒妻寬兒卒時氏年二十四歲無子女矢志守貞享壽七十四歲卒計守節五十年

張氏東官池村帖永儼妻永儼卒時氏年十六歲無子女矢志守貞撫姪正銀爲夫嗣享壽八十歲計守節六十二年

季氏東官池村酒洛兒妻洛兒卒時氏年二十五歲矢志守貞撫孤進堂成立事親以孝聞於鄉里現年五十八歲計守節三十三年

馬氏三里村小學畢業生王振邦妻節婦魚氏之姪媳也振邦卒時氏年二十八歲無子女矢志守貞事翁姑以孝聞於鄉里二十二年卒享年五十九歲計守節三十年

朱氏興平村拜得寧妻得寧平時氏年三十歲遺子忠勤七歲氏守貞撫孤後忠勤夫婦又早逝遺子恆昇氏又撫弱孫成立艱苦終身卒時壽九十歲計守節六十年

張氏三里村李寅娃妻寅娃卒時氏年二十八歲僅遺一女矢志守貞寄居母家多年始歸現年六十五歲計守節三十八年

李氏上呂曲村路福遂妻年十五于歸寄居城內集聖村有姑在堂奉事惟謹家雖貧旨甘必求豐潔姑病則躬治湯藥滌垢浣污不辭勞瘁年二十九夫故哀傷飲泣痛不欲生因有遺孤二乃節哀順受賴晝夜紡績以度卒能撫孤成立旋長子病歿次子瘋癲艱難支持一如昔時現年六十六歲守節三十七年

王氏原劉家劉新全妻年十七于歸翁姑在堂克盡孝養先後育子女三人均幼殤數年後翁姑相繼卒未幾新全又逝時氏年二十六

歲家極艱窘勤績紡務針黹以供日用撫姪榜勞爲嗣爲之授室現年五十七歲苦節三十二年

雷氏似仙渠張復良妻年二十二歲寡子紀善未週歲家貧如洗無以爲生氏惟恃女紅度日備嘗辛苦撫子成立爲定童養媳未及結婚而氏竟卒時年四十餘矣

王氏馮村李明兒妻夫死於同治九年氏年二十八撫堂姪崇新奉夫祀晝則耕作夜則紡績力苦終身民國九年卒年七十八守節五十年

楊氏大壕營顧星垣妻總角時嘗立楊仁甫先儒之門聽讀書聲先生詫異因授之讀于歸後事繼母孝有堂嫂武氏異居多年憐其無依邀同依度年三十而寡設家塾教子讀夜則於燈前爲兒輩說故事苦節三十年民國元年卒壽六十歲

薛氏晁邑坊蘭際春妻年二十四寡民國四年卒苦節四十年

雷氏馮村李萬祿妻幼適萬祿卽能孝恭同治六年髮匪擾境萬祿攜家逃城內瘟疫大作萬祿染病殞命時氏年二十七歲艱苦撫弟萬善成人娶室生子朝棟氏撫爲夫後里人皆贊其深明大義民國八年病卒年七十九守節五十二年

姚氏東漢村單先甲妻同治元年夫亡氏年二十孝事叔舅教子成名苦節五十九年學憲表以孝慈貞潔入民國卒壽七十九

胡氏東漢村石監才妻年二十六寡孝事翁姑苦節四十七年民國時卒壽七十三歲

李氏晁邑坊蘭在澧妻年二十二寡民國十一年卒苦節五十七年  
朱氏晁邑坊拔貢蘭在澧妻年二十二寡淑慎有德撫姪成立民國十四年卒苦節四十八年

王氏晁邑坊蘭福妻年二十寡苦節七十年民國十五年卒壽九十歲

成氏大壕村武元善妻年二十四寡苦節三十九年民國十七年卒  
吳氏馬家營呂炳申妻年二十八寡苦節五十年民國時卒壽七十  
八歲

康氏草橋店石新德妻年十八而寡子二歲氏立志撫孤苦節五十  
七年民國十八年卒壽七十五歲

高氏城內仁厚里張金超妻年二十七寡事兄如父事嫂如母計苦  
節已四十三年民國凶荒住德盛菴

孫氏東城南張志定妻年二十二寡現守節五十四年

王氏北坡底楊曾妻年十九而寡現守節四十年

梁氏大壕村武進善妻年二十二寡現守節三十三年

王氏西漢村趙寶鏡妻年二十寡現守節五十五年

胡氏草橋店趙祥太妻年二十八而寡現守節四十八年

劉氏趙祥太之妾年十八而寡現守節亦四十八年

崇氏草橋店魏遇成妻年二十四寡現守節五十四年

陳氏高章營楊坤妻年二十寡現守節四十六年

王氏上埝頭馮繼妻年三十而寡現守節四十七年

趙氏上埝頭劉賢書妻于歸時年甫十七一月餘而夫出外竟亡氏

撫養姪子成立鄰村皆稱其賢淑苦節現已五十四年

李氏暢家村張信義妻年二十六夫出外無踪氏撫養姪子教以義

方現苦節三十五年

劉氏暢家村郝芝祥妻年十九而寡計苦節四十年宣統時卒民國

三年大總統褒獎

高氏馬家營呂炳一妻年二十寡現守節五十九年

李氏馬家營呂堂妻年二十六寡現守節五十八年

徐氏上垚頭王滿成妻年二十七寡現守節六十五年

胡氏上呂曲路廣林妻年三十寡民國四年卒計苦節三十七年

張氏晁邑坊馬宜垚妻年二十而寡民國四年卒計苦節四十五年

賁氏晁邑坊楊核槎妻年二十二而寡民國十七年卒計苦節六十

二年

張氏平原坊張俊茂妻年二十三而寡民國十五年卒計苦節三十

六年

雷氏平原坊劉毓芬妻年十八而寡現計苦節五十一年

王氏船舍鎮李學震妻年二十五歲寡撫姪爲嗣教養備至苦節五

十餘年享年八十歲

王氏新莊村張聚亭妻聚亭自父叔析居家窘甚移住南七村以縫千張羊皮工藝度日不幸夫卒遺三子皆幼少者纔三閱月時氏年二十五歲茹苦含辛備受艱阨撫三子成立長振魁商於棗陽先氏卒次振泉商於本城季振玉商於三原家道日興里人皆慶氏之辛苦食報也卒年六十有二計守節逾三十年

孫氏渭陽區東陳村李彥芬妻年二十三歲寡女僅兩歲子纔四月矢志守貞撫子女成立不幸子女成人竟相繼歿氏復撫彥芬從孫天赦爲嗣現年五十五歲計苦節三十三年

吳氏陳村李有財妻年二十九寡生遺腹一男矢志守貞撫子成立後弟婦早卒遺子女數人皆幼氏兼撫之不異己子歲時親友至其家者見羣子女皆依戀於氏其子姪之形迹悉泯民國三年卒年六十六歲守節三十八年

大荔縣志卷十一  
楊氏西興平村廩生拜自下妻自下卒時氏年二十六歲遺一女臨  
窆時卽欲身殉親戚多諭以女幼無託何以面夫氏抱女哀號忍死  
撫育日惟賴績紡爲生善女紅凡所成之布精密絕倫出售時價常  
昂於人而人多樂用之女長已字而卒氏煢煢獨立現年五十六歲  
苦節無報里黨哀之

王氏中胡村史隨心妻年二十三歲寡矢志守貞現年五十九歲計  
守節三十七年

雷氏西胡村王恆錫妻年二十五歲寡矢志撫孤現年五十五歲計  
守節三十年

宋氏沙苑區龍泉村趙科妻年二十歲寡遺一子未週歲矢志撫孤  
始終如一現年六十七歲計守節四十八年

劉氏洪善村潘宗泮妻年二十二歲寡無子女矢志守節後撫其姪

爲夫嗣現年八十一歲計守節五十九年

袁氏西龍坊村張甲武妻年二十歲寡遺子尙幼矢志守貞現年七十五歲計守節五十五年

王氏石曹村秦水甯妻同治紀元水甯死於回時氏年十九歲矢志守貞後撫姪爲夫嗣現年八十八歲計守節六十九年

路氏阿河村康孝兒妻年二十一夫亡守節三十四年

趙氏北高遷村郝召祥妻自十六歲嫁後夫出外四十餘年永無踪跡氏清節株守艱苦度日人無間言亦可風矣

李氏杜家灘杜吉林妻氏二十歲寡守節四十餘年

董氏葉家寨葉慶祥妻其夫被髮寇擄去死於外計守節五十年

張氏柳池村王腊兒妻年二十五歲寡守節四十餘年

張氏西長城村官吏房書判李寶乾妻年十八歲寡撫姪堂娃爲子

守節三十六年

王氏石曹村秦根惠妻年三十歲夫卒秦氏石曹村王拴鎖妻年十九歲夫卒馬氏三教村高登捷妻年二十五歲夫卒王氏新党村党中和妻年二十歲夫卒王氏新党村党和喜妻年二十七歲夫卒皆遺一子矢志守貞撫子成立均守節至五十年

王氏上呂曲村路春發妻年二十一寡子運興週歲家僅壚田十畝房數間難爲守氏則曰孀姑不棄我我棄孀姑無人道晝則姑婦力田揮鋤舉鍤無牲畜亦不假諸鄰夜歸針黹紡織常聞鷄始寢志堅性慧手工所成人多樂購至禾稼之土宜種穫之天時精驗熟籌老農常遜理財有法律身克儉家轉裕姑老病瞽氏滌穢無厭教子寓嚴督於優獎門內肅然晚年樂善好施年逾六十強健不衰

王氏三教村高筱擇妻筱擇卒時氏年三十歲無子矢志守貞撫姪